

दिनांक 06.12.2023

समय: 18.50 बजे

नमस्कार

आकाशवाणी जयपुर—अजमेर

प्रादेशिक समाचार

- राज्यपाल कलराज मिश्र सुखदेव गोगामेडी हित्या मामला पाछे आज प्रदेश मांय कानून—व्यवस्था रा हालात रो खास जायजो लीनो— पुलिस अर प्रशासन ने हर लेवल माथे असरदार जतन करण बाबत् कह्यो।
- राष्ट्रीय राजपूत करणी सेना कानी ऊं प्रदेश मांय बुलायी ज्या बंद रे कारण घणखर जिलां मांय बाजार बंद रह्या।
- भारत रत्न डॉक्टर भीम राव अम्बेडकर रा महापरिनिर्वाण दिवस रे मौके आज श्रद्धांजलि कार्यक्रम राख्यी ज्या।

अर

- प्रदेश मांय ठण्ड रो असर और बध्यो—माउंटआबू मांय पारो जमाव बिन्दू ऊं नीचे उतर्यो।

000

सुखदेव गोगामेडी हित्या मामला पाछे राज्यपाल कलराज मिश्र आज राज्य रा मुख्य सचिव, गृह सचिव, पुलिस महानिदेशक अर जयपुर रा पुलिस कमिश्नर ने राजभवन मांय तलब कर र प्रदेश री कानून अर शांति व्यवस्था रो जायजो लीनो। वे कह्यो के प्रदेश मांय गोळियां चला र दिन दहाड़े हित्या करण रो मामलो गंभीर है। वे संगठित अपराध रे कारण उपजा हालात माथे लगातार निगराणी राखण रा हुकम दीना। राज्यपाल ईं मामला मांय आरोपितां ने पकड़बा सारू पुख्ता कार्रवाई तैय करण बाबत् ईं कह्यो। वे कह्यो के प्रदेश मांय हर लेवल माथे कानून—व्यवस्था बणायी राखण सारू पुलिस अर प्रशासन ने हर लेवल माथे असरदार जतन करणा चाहिजे। मीटिंग मांय मुख्य सचिव उषा शर्मा बतायो के प्रदेश मांय जिला कलेक्टर रा लेवल माथे हालात माथे लगातार निजर राख्यी ज्या रही है। वे बतायो के शांति व्यवस्था बणायी राखण सारू केंद्रीय सुरक्षा बलां री तीन कंपनियां तैनात करी ज्यी है। पुलिस महानिदेशक उमेश मिश्रा अर गृह विभाग रा प्रमुख सचिव आनंद कुमार कह्यो के ईं मामला मांय आरोपितां ने गिरफ्तार करण री लगातार कोशिसां करी जा रही है। राज्यपाल जनता ऊं शांति—व्यवस्था बणायी राखण मांय मदद करण री अपील कीनी।

000

राष्ट्रीय राजपूत करणी सेना रा अध्यक्ष सुखदेव सिंह गोगामेडी री हित्या रे खिलाफ राष्ट्रीय राजपूत करणी सेना री ओर ऊं आज बुलायी ज्या बंद रो राज्य मांय असर निजर आयो। जयपुर, जोधपुर, कोटा, टोंक, डूंगरपुर, नागौर, उदयपुर, अजमेर, करौली, बीकानेर, जैसलमेर अर चूरू समेत केई जिलां मांय बाजार बंद रह्या। राजधानी जयपुर मांय घणखर बाजार अर मॉल बंद रह्या। अधिकतर स्कूलां मांय ई छुट्टी राख्यी ज्यी। केई ठौड़ां ऊं तोड़ा-फोड़ी रा समाचार ई मिल्या है। केई जगहां प्रदर्शन करण वाळा जाम लगा दीनो। जोधपुर रेलवे टेसन माथे पूग्या लोग नाराबाजी कीनी। भीलवाड़ा मांय मदार-उदयपुर रेल ने 20 मिनट तांई रोकी ज्यी, जिण ने समझाइश पाछे रवाना करी जा सकी। चित्तौड़गढ़ अर शाहपुरा समेत केई हलकां मांय बंद रो असर निजर आयो। गृह विभाग रा प्रमुख सचिव आनंद कुमार बतायो के सुखदेव हत्याकांड री जांच एनआईए ने संपण रा बारा मांय आंदोलन करण वाळा सागे बातचीत चाल रही है अर मामला ने सुलझावण सारू हर संभव कोशिश करी जा रही है। वे जनता ऊं शांति बणायी राखण री अपील कीनी।

ई बीचे पुलिस महानिदेशक उमेश मिश्रा मामला री जांच सारू एडीजी क्राइम दिनेश एम एन रा पर्यवेक्षण मांय खास जांच दल-एसआईटी बणायी है। केन्द्रीय विधि मंत्री अर्जुन राम मेघवाल ई वारदात री निंदा कीनी है। संसद रे बाहर खबरनवीसां सागे बातचीत करता थकां मेघवाल कह्यो के ओ कांग्रेस राज मांय राजस्थान मांय बिगड़ी कानून-व्यवस्था रो नतीजा है।

.....

भाजपा रा नेता राजेन्द्र राठौड़ गोगामेडी हित्या मामला री जांच राष्ट्रीय जांच एजेन्सी-एनआईए ऊं करावण री मांग कीनी है।

000

प्रदेश रा 199 विधानसभा हलकां मांय फोटो लाग्योडी वोटर लिस्टां मांय नाम माण्डण, हटावण या वां मांय बदलाव करावण रो काम 6 जनवरी 2024 ने ओजू सरू कर्यो जावेला। मुख्य निर्वाचन अधिकारी प्रवीण गुप्ता बतायो के करणपुर विधानसभा हलका मांय चुनाव कार्यक्रम रो ऐलाण व्हेवण रे कारण वटे 6 जनवरी ऊं मतदाता सूची पुनरीक्षण कार्यक्रम नी चलायो जावेला। गुप्ता बतायो के प्रदेश मांय एक जनवरी, 2024 ने 18 साल री उम्र पूरी करण वाळा ऐडा रेहवासी ज्यां रा नाम वोटर लिस्टां मांय नी है, वे ई कार्यक्रम रे मार्फत नाम वोटर लिस्टां मांय जुड़वा सके है। मुख्य निर्वाचन अधिकारी बतायो के संबंधित विधानसभा हलकां मांय एकीकृत मतदाता सूचियां रो मजमून 6 जनवरी 2024 ने कर्यो जावेला। दावा अर आपत्तियां 6 ऊं 22 जनवरी तांई दाखिल कर्या जा सकेला। 2 फरवरी 2024 तांई दावा अर आपत्तियां रो निपटारो कर्यो जावेला अर वोटर लिस्टां अंतिम तौर ऊं 8 फरवरी 2024 ने छपी जावेला।

000

प्रदेश मांय विधानसभा चुनाव रा नतीजा जारी व्हेवण रा तीन दिन पाछे ई मुख्यमंत्री रो नाम तैय करण सारू भारतीय जनता पार्टी मांय विचार चाल रह्यो है। ई बीचे, आज नुवा चुणी ज्या विधायक राज्यवर्धन राठौड़ अर दिया कुमारी लोकसभा री सदस्यता ऊं अर डॉ. किरोड़ी लाल मीणा राज्यसभा री सदस्यता ऊं इस्तीफो दे दीनो। अ तीन्यू नेता संसद री सदस्यता ऊं इस्तीफो देवण वाळा मध्यप्रदेश अर छत्तीसगढ़ रा नेतावां सागे प्रधानमंत्री नरेंद्र मोदी ऊं मुलाकात कीनी। ई बीचे भाजपा रा नुवा चुणी ज्या विधायकां रो जयपुर मांय पार्टी रा आला नेतावां सागे मुलाकात रो सिलसिलो ई चाल रह्यो है।

नुवा चुणी ज्या केई विधायक भाजपा रा प्रदेश अध्यक्ष सी.पी. जोशी ऊं वां रा रेहवास माथे अर प्रदेश कार्यालय मांय मुलाकात कीनी। केई विधायक पैली वाळी मुख्यमंत्री वसुंधरा राजे सागे ई मुलाकात कर रह्या है। लारला दो दिन मांय राजे ऊं वां रा रेहवास माथे नुवा चुणी ज्या छत्तीस ऊं बत्ता विधायक मुलाकात कीनी। पार्टी रा आला नेतावां रे मुजब भाजपा आलाकमान सगळा नेतावां सागे बातचीत कर र इण ई सप्ताह मुख्यमंत्री रा नाम रो ऐलाण करण री मंशा राखे है। ई बीचे, सवाईमाधोपुर ऊं नुवा चुणी ज्या विधायक किरोड़ीलाल मीना आज नई दिल्ली मांय कह्यो के प्रधानमंत्री नरेन्द्र मोदी जनता सामी ऐड़ा फैसला लावे है जो कोई सोच ई नी सके है।

000

देश आज भारत रत्न डॉक्टर भीमराव अम्बेडकर ने वां रा 68वां महापरिनिर्वाण दिवस रे मौके सिरधा भाव सागे याद कर रह्यो है। ई मौके राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेंद्र मोदी, लोकसभा अध्यक्ष ओम बिरला, पैली वाळा राष्ट्रपति रामनाथ कोविंद, केई केन्द्रीय मंत्री अर सांसद संसद भवन परिसर मांय डॉक्टर अम्बेडकर री मूरत माथे सिरधा रा फूल चढाया। सामाजिक न्याय अर अधिकारिता विभाग री ओर ऊं महापरिनिर्वाण दिवस रे मौके खास कार्यक्रम राख्यी ज्यो। प्रधानमंत्री नरेन्द्र मोदी सोशल मीडिया पोस्ट रे जरिये कह्यो के डॉक्टर अम्बेडकर संविधान निर्माता व्हेवण सागे ई सामाजिक समरसता रा हिमायती हा अर वे पूरी जिन्दगी शोषित अर वंचित तबका री जनता रा भला सारू लगा दीनी।

000

गृह मंत्रालय संगठित निवेश या अंशकालिक काम आधारित रोजगार देवण री धोखाधड़ी मांय शामिल एक सौ ऊं बत्ती वेबसाइटां री पिछाण कर र वां ने भारतीय साइबर अपराध समन्वय केंद्र री पहल रा तैत ब्लॉक कर दीनी है। मंत्रालय री आधिकारिक पानड़ी रे मुजब ऐड़ी वेबसाइटां माली अपराधां ने बधावो दे रही है। मंत्रालय रे मुजब अ वेबसाइटां परदेसां ऊं चलायी जा रही ही। धोखाधड़ी सारू डिजिटल विज्ञापन, चैट मैसेंजर अर गैर—कानूनी तरीका काम लिया जा रह्या हा। गृह मंत्रालय जनता ऊं ऐड़ा दगाबाजां कानी ऊं काम लिया ज्या फोन नंबर अर सोशल मीडिया हैंडल री जाणकारी तुरत राष्ट्रीय साइबर अपराध रिपोर्टिंग पोर्टल माथे देवण बाबत् कह्यो है।

स्वास्थ्य अर परिवार कल्याण मंत्रालय अर आयुर्विज्ञान मांय राष्ट्रीय परीक्षा बोर्ड री ओर ऊं आज कार्डियो पल्मोनरी रिसर्चिशन—सीपीआर रा बारा मांय जाग जगावण सारू देश भर मांय सिखावण कार्यक्रम राख्यी ज्या। ई मौके स्वास्थ्य अर परिवार कल्याण मंत्री डॉ. मनसुख मांडविया नई दिल्ली मांय राख्यी ज्या सिखावण कार्यक्रम मांय सिरकत कीनी। ई मौके मांडविया कह्यो के ई कार्यक्रम रो मकसद कार्डियाक अरेस्ट यानि दिल री धडकन बंद व्हे जावण री सूरत मांय तुरत चिकित्सा सहायता देवण रा बारा मांय जाग जगावणो है।

.....  
000

राज्य मांय लगातार पारो उतरण ऊं ठण्ड रो असर बध ग्यो है। संवारे अर सिंज्यां सागे दोपहर मांय ई सर्दी रो अहसास व्हेवण लाग्यो है। सिरोही जिला रा माउंटआबू मांय आज पारो जमाव बिन्दू ऊं नीचे उतर ग्यो । म्हाणा खबरनवीस बतायो के जोरदार ठण्ड ऊं जिन्दगी माथे असर पड रह्यो है।

.....

मैदानी हलकां मांय सीकर जिला रा फतेहपुर मांय आज पारो उतर र 5 दशमलव 4 डिग्री सेल्सियस दर्ज करी ज्यो। सीकर मांय 6 दशमलव 9, हनुमानगढ जिला रा संगरिया मांय 7 दशमलव 3, चूरु मांय 7 दशमलव 4, अलवर मांय 9 दशमलव 6 अर करौली मांय न्यूनतम तापमान 10 दशमलव 3 डिग्री सेल्सियस दर्ज करी ज्यो। दिन मांय ई घणखर ठौड़ां तापमान 20 ऊं 24 डिग्री सेल्सियस रे आरे-सारे चाल रह्यो है। मौसम विभाग रे मुजब आवता चार-पांच दिन मांय तापमान मांय मोटा बदलाव रा आसार नी है।

000

असम राइफल्स री ओर ऊं आज जयपुर मांय असम राइफल्स रा पैली वाळा फौजियां री रैली निकाली ज्यी। रैली मांय वीरता पुरस्कार ऊं नवाजी ज्या फौजियां, वीर नारियां, वीरांगनावां अर वां रा पिरवार वाळां समेत राज्य रा 200 ऊं बत्ता पैली वाळा फौजी सिरकत कीनी।

000